


TSY AMIM-BOLA

NA AMIN-KARENA

 Tena tombontsoa tokoa ny tafaverina eto amin'ny tabernakla, izao maraina izao. Manontany fotsiny aho. . . Nilaza i Rahalahy Neville fa maro ny tany aoriana no tsy afaka nandre. Afaka mandre ahy tsara mihitsy ve ianareo ankehitriny, ery aoriana ery? Mety tsara ve? Eny àry. Izaho dia—kely aho, noho izany dia tsy maintsy manao tabataba betsaka aho mba ahafantaran'ny olona fa eto aho.

² Noho izany, tsaroako indray mandeha rehefa niasa tao amin'ny Public Utilities aho. Niakatra ny tohatra aho. . . Ary zatra nitondra an'ireo kiraro goavana be aho taloha, miaraka amin'ireo fantsika be eo amin'izy ireny, mba tsy hanitsahana an'ireo taribin'ny herinaratra ambony. Dia niakatra an'ireo tohatra aho. Ary Rtoa. Ehalt, izay sakaizako, no tany amin'ny foibe fandefasana. Azoko antoka fa Atoa. Ginther any dia mahafantatra azy, tsara mihitsy. Noho izany dia hoy i Edith hoe, “Billy, manao an'ilay tabataba be indrindra ianao, nefa lehilahy kely tahaka an'io, izay hany hitako.” Najadoko mafy ireo fantsika goavana, niakatra teo amin'ireo tohatra.

³ Hoy aho hoe, “Eny, Edith, tena kely aho, tsy maintsy manao ny olona rehetra hahafantatra aho fa eto aho, manao tabataba betsaka.”

⁴ Eny, vao avy niditra aho mba hiantso. Niteny tamiko Rahalahy Neville fa ny sakaizantsika tsara, Rahalahy Roy Roberson, dia tsy ato amin'ny fivoriana izao maraina izao, satria marary. Ny. . . Nanana nify iray naniry izy. Niteraka vay izany, ary nanome azy tazo iray. Ary tsy maintsy nesoriny izany, heveriko, teo no ho eo. Ary Roy dia efa toy ny ray iray ho antsika eto, ary tiantsika izy. Dia hoy aho hoe, “Rahalahy Roy, izaho—hiditra aho ankehitriny, afaka minitra vitsy fotsiny, ho an'ny fotoana.” Hoy aho hoe, “Hangataka ny fiangonana aho mba hivavahanay rehetra ho anao, izao maraina izao,” sy rahampitso rehefa handeha ho any izy, mba hikarakara an'izany. Nitombo nililana ilay nify, na tahaka an'izany, lasa diso faniry, ka tsy maintsy nanongotra azy izy ireo, ary nanala azy.

⁵ Rahalahy Roy dia mpiady tranainy iray, araka ny fantatsika rehetra, tamin'ny Ady Lehibe Faharoa, izay voatifitra potipotika mihitsy. Ary raha tsy nohon'ny fahatsarampanahin'Andriamanitra, dia tsy ho velona akory aza izy. Nampandriana teo anivon'ny maty izy, nandritry ny elabe; ireo sandry nivoaka teto, ary ireo ranjo nivoaka, ary ireo

hozatra lehibe roa maty. Ary hoy ny dokotera hoe, “Raha mba velona izy, dia tsy hanao dingana iray mihitsy.” Nohon’ny fahasoavan’Andriamanitra, dia miasa isan’andro izy, mihanika sy ny sisa. Efa tsara taminy Andriamanitra satria lehilahy tsara iray izy, ary tiantsika izy. Ary isika, isika dia—isika rehetra dia tsy . . .

⁶ Raha miaina tsara isika, izany dia tsy midika fa ho afaka amin’ireo olana isika. Am-pahatsorana, izany dia midika fa ireo olana rehetra dia nalefa eo amin’ny lâlantsika. “Fa maro ny fahorian’ny marina, fa Andriamanitra manafaka azy amin’ireo rehetra ireo.” Izany ilay ampahany lehibe.

⁷ Noho izany dia hangataka vavaka manokana fotsiny isika izao maraina izao, ho an-dRahalahy Roy. Manontany aho raha misy ato, mbola, te-hivavahana, te-ho tsarovana amin’ny tonombavaka iray? Raha hanangana ny tânany fotsiny izy ireo. Eny àry. Tsara izany. Ndao isika hitsangana vetivety, raha sitrakareo, raha mivavaka isika.

⁸ Tompo, tonga izahay androany, amin’ny fanombohan’ny sabata. Ary manao ny diany fotsiny ilay masoandro ankehitriny, handeha hitety an’izao tontolo izao, mba hitondra hazavana sy fiainana ho an’ireo zavatra nandidiana azy mba hataony. Ary amin’ny fanombohan’ny fotoana izay . . . Ampahan’Ny Fiangonanao izahay, izay efa nantsoina hanao asampanasitranana, fanasitranana ara-batana ho an’ny vatana; mba hanatanteraka an’ireo firariana sy fanirian’ny Tomponay finaritra Izay voalefona nohon’ny fahotanay, ary ireo Diankapony no nanasitranana anay. Ary hangataka izahay, amin’ny fanombohan’ny fotoana, raha manomboka maka ny elany izany, amin’ireo hira, ka manomboka hakarina ny fonay, mba hahatsiarovanay, izao maraina izao, Tompo, ny malalanay, rahalahy sarobidy, Roy Roberson, Mpanomponao manetry tena. Ary fantatray fa Ianao no nitahiry ny ainy teny an-tany fiadiana, ary efa tsara taminy Ianao. Ary androany dia mijaly amin’ny fahoriana izy, ka tsy afaka manatrika ny fiangonana.

⁹ Ary, Tompo, raha mbola nivavaka izy ireo tany an-tranon’i John Mark, dia nisy Anjely nidina tao amin’ny tranon’ny fonja, izay nisy an’i Petera tao amin’ny fifatorana, dia nivoha ireo varavarana, tamim-pahagagana, ary namela azy hivoaka.

¹⁰ O Tompo, mbola Andriamanitra foana Ianao. Eo amin’ny Baikonao ireo Anjely ireo izao maraina izao. Mivavaka izahay, Tompo, hoe raha mbola mivavaka eto amin’ny tranon’Andriamanitra izahay, dia mba hidina eo amin’ny tranon-dRahalahy Roberson ireo Anjely. Ny faniriany dia ny ho eto amin’ny toerany eto, saingy nandavo azy ny fahoriana. Ary enga anie hanafaka azy ireo Anjelin’Andriamanitra, hanao azy ho salama, mba ahafahany haka ny toerany indray eto amin’ny tranon’Andriamanitra.

¹¹ Misy ireo hafa izay efa nandalo fahasarotana, izy ireo—narary izy ireo. Ary nahita vehivavy zokiolona izahay, raha saika haka ny sezany izy, nanangana ny tànany, rehefa nandringa izy teo amin'ny tongony. Tonga teo amin'ny tranon'Andriamanitra izy, mba ho sitrana. Ekeo, Tompo, mba handeha hivoaka izy, miaraka amin'ny lohataona sy hatanoran'ny vehivavy tanora iray.

¹² Ireo hafa rehetra izay nanangana ny tànany, maro amin'izy ireo no nitsangana, satria izao no voasoratra, ary efa voatonona teo aloha hoe, “Maro ny fahorian'ny marina, fa Andriamanitra manafaka azy amin'ireo rehetra ireo.” Enga anie izahay hanidina ao amin'ny finoana androany, ireo sandrin'ny finoana, izay hanafaka anay amin'ny aretina sy fahoriana rehetra. Rehefa mifarana ny fotoana, dia enga anie tsy hisy malemy anankiray eo afovoanay.

¹³ Ekeo, Tompo, mba ho lasa mpino iray ny tsi-mpino rehetra. Ary raha misaintsaina Ny Teninao izahay, dia enga anie ny Fanahy Masina handray an'Izany ary hametraka an'Izany ao amponay, ka hanondraka an'Izany ao mandra-pahatongan'Izany ho vokatry ny Teny. Ataovy ho anay izany, Tompo, raha manondrika am-panetre-tena ny lohanay izahay ka mangataka an'izany amin'ny Anaran'i Jesosy. Amena.

Afaka mipetraka ianareo.

¹⁴ Alohan'ny hidirana ao amin'ny hafatry ny fotoana ho an'ity maraina ity mihitsy, dia tiako ny hisintona ny fisainanareo, akaikikaiky kely. Raha misy ny sasany aminareo izay manao fakan-drivotra, ka te-hanatrika ny iray amin'ireo fotoana izay hatao any Middletown, Ohio, manomboka amin'ny Alatsinainy, herinandro iray, izany dia ho ao amin'ireo toeram-pilasiana.

¹⁵ Fantatrao fotsiny ve ny anaran'ireo toeram-pilasiana, Gene? [Hoy Rahalahy Gene hoe, “Voalaza fa any amin'ny roa ambin'ny folo maily avy ao Middletown ilay izy.”—Mpand.] Rahalahy Sullivan. Middletown dia tanàna kely iray, heveriko fa saiky mitovy amin'i Jeffersonville eto. Foiben'ny basketball izany. Rahalahy Sullivan no pasitera any. Ary ny tsirairay amin'ireo fiangonan'ny Full Gospel, izay misy enimpolo mahery eo no miara-miasa amin'ity fivoriana ity, dia afaka hiteny aminareo hoe aiza no misy an'ireo toeram-pilasiana.

¹⁶ Ary hisy tranohava maro eo amin'ireo toeram-pilasiana, araka ny notenenina tamiko, hikarakarana ny olona izay te-ho tonga. Ary ireo fivoriana dia hanomboka amin'ny Alatsinainy hatramin'ny Sabotsy, enina andro. Ary tsy hisy ny Alahady, noho ireo fiangonana hafa, mba ahafahan'izy ireo hanana ny fotoany mahazatra. Angamba, hisy asam-panasitranana, na vavaka ho an'ny marary, isan-kariva. Ary asaina ny tsirairay avy. Ary izany dia hanomboka ny Aogositra faha-10, hatramin'ny faha-15, Alatsinainy hatramin'ny Sabotsy. Ary raha manao fakan-

drivotra ianareo, sy—sy manatona ny fakan-drivotrareo, ka maniry ny handany azy amin'ny fanao tahaka an'izany, eny, dia azonay antoka fa ho faly izahay hanana anareo.

¹⁷ Hampahery an'ireo rehetra izay tsy mbola natao batisa tamin'ny batisa Kristiana ihany koa aho, mba hijanona izao maraina izao ka hieritreritra an'izany. Ary aoka ho vonona ho an'ny fotoan'ny batisa izay hanaraka afaka eo amin'ny dimy amby efapolo minitra eo ankehitriny, heveriko. Ho eto amin'ny fiangonana izany.

¹⁸ Tena mirona hampahery ny olona mihitsy izahay mba hatao batisa amin'ny batisa Kristiana, eo am-pahafantarana fa zava-dehibe amin'ny famonjena izany. Satria voasoratra ny Tompontsika izany, ny Fanirahany farany, ny Fanirahany farany ho an'ny Fiangonana. Na, raha naniraka ny Fiangonana Izy, ilay farany, dia hoy Izy hoe, “Mandehana any amin'izao tontolo rehetra izao, ka mitoria ny Filazantsara amin'ny olombelona rehetra. Izay mino sy hatao batisa no hovonjena.” Noho izany dia fantatsika fa zava-dehibe ny anaovana batisa antsika amin'ny fanitrihana.

¹⁹ Ary ho faly izahay ny hanolotra anareo an'izany fotoana izany, ho an'ny tsirairay izay resy lahatra ao am-pony fa Jesosy Kristy no Zanak'Andriamanitra, ka maty Izy mba hamonjy an'ireo mpanota, ary ianareo no iray izay Nahafatesany mba ho vonjena; ka tianareo ny ho avy ary hatao batisa amin'ny Anaran'i Jesosy Kristy ho famelàna ny fahotanareo; milaza, amin'izao tontolo izao, hoe mino ianareo fa navela ny fahotanareo, ary hoe ho lasa mpianatra iray an'ny Tompo Jesosy ianareo ankehitriny, mba handray ny toeranareo.

²⁰ Raha tsy manana fiangonana handehanana ianareo, dia ho faly izahay ny hanana anareo hiombona aminay. Tsy manana mambra izahay eto. Tabernakla iray misokatra izy, ho an'ny Vatan'i Kristy rehetra, avy any amin'ny anaram-piangonana rehetra. Mijoro ho firaisan'ny anaram-piangonana iray izahay. Ary manokatra ny varavarana ho an'ny olona rehetra izahay, tsy mampaninona na iza izy ireo, ny lokony, ny firazanany, na ny fanekem-pinoany, ny olona rehetra dia tongaso. “Na iza na iza maniry, dia tongava.” Ary raha tsy manana fiangonana hafa ianareo, dia ho faly izahay ny hahatongavanareo fotsiny ka hiombona aminay. Tsy misy na inona na inona hikambanana. Midira avy hatrany fotsiny rehefa misokatra ireo varavarana, ary miombona aminay. Izay ihany no ilainareo; tonga tahaka an'izany fotsiny. Tongava miaraka amin'ny fo iray misokatra, apetraho eo amin'ilay kodia fotsiny ny sorokareo, dia ampio izahay raha mandroso nohon'ny amin'ny Fanjakan'Andriamanitra. Satria, tena mino izahay fa ilay ora, antomotra tsy ho ela, izay misy an'ireo zavatra rehetra izay voateny tao amin'ny Baiboly dia ho tanteraka.

²¹ Tsy isalasalana fa maro aminareo no efa namaky ny an'i Khrushchev, ny fanambarany tamin'ny U.N., indray andro, raha notononina tamiko izany avy tamin'ny gazety Kanadiana iray, tamin'ny alàlan'ny sakaiza iray. Hoy izy hoe, "Raha misy Andriamanitra iray, dia vonona ny hifaoka sy hanadio ny tempoly indray Izy, miaraka aminareo kapitalista, tahaka ny Nataony tany amin'ny voalohany." Noho izany dia afaka mamaky ny eny anelanelan-tsoratra ianareo ankehitriny, "Vonona Izy ny hifaoka an'ilay tempoly indray." Ary tsy mampahatahotra ve, raha kominista iray no tokony hilaza zavatra iray tahaka an'izany? Nanana zavatra iray izy, na izany aza. Marina izany. Ireo kapitalista, tany amin'ny voalohany, no niteraka ny olana. Kapitalista isika.

²² Nandre ny malalantsika aho, ny pasitera malala, Rahalahy Neville, nanao fanamarihana iray teo amin'ny televiziony. . . na fandaharan'ny radio, indray maraina, izay nandeha hatrany sy hatrany, tao amin'ny fisainako. Tsy afaka manadino an'ilay izy mihitsy aho. Notononiko tamin'ny sakaizako iray izany, omaly hariva. Ary izany dia ity, hoe hisy. . . Aorian'ny hanesorana ny Fanahy Masina, hiala amin'ny tany, dia hanohy avy hatrany io fiangonana ara-pototra io, tsy mahafantatra ny fahasamihafana. Ianareo ve efa mba, efa. . . Firy no nandre an'izany? [Hoy ny fiangonana hoe, "Amena."—Mpand.] Tsy mahatalanjona ve izany? Tsy mahafantatra ny Fanahy Masina izy ireo, noho izany dia tsy ho fantatr'izy ireo hoe oviana Izy no lasa, fa hanohy avy hatrany foana mihitsy tahaka an'izany izy ireo. Rehefa voaisy tombokase ao amin'ny Vatan'i Kristy ilay anankiray farany, dia mbola hanohy foana izy ireo, hiezaka ny hitondra miova fo eo amin'Izany, satria tsy fantatr'izy ireo hoe inona Izany. Ary ny fivavahan'izy ireo ara-pototra dia hanohy tahaka ny naha-izy azy ireo fotsiny. Ankehitriny, mety tsy milentika ao anatinareo tahaka ny nataony tamiko izany, saingy fanambarana iray mahatalanjona marina tokoa izany. Fa, ho lasa lavitra izy ireo, ao anatin'ireo fomba fanao ara-pivavahana fotsiny, hany ka ho diso ny Fanahy Masina izy ireo, satria tsy fantatr'izy ireo hoe inona Izany, eo am-panombohana.

²³ Hamindra fo amintsika anie Andriamanitra. Rahalahy, tiako ny hiaina amin'ity fiainana ity, ka ny faniriako, dia na ny hany farany bitika indrindra amin'ny Alahelony aza, dia ho fantatro ao am-poko izany. Raha tokony hanao zavatra izay hampalahelo Azy aho, dia ho afaka hahatsapa an'izany mihitsy ao anatin'ny fotoana fohy.

²⁴ Avelao any, ny tsy maha-eo Azy; tsy te-ho eto aho rehefa tsy eto Izy. Te-ho lasa aho amin'izay fotoana izay, eny, tompoko, satria tsy hisy Rà intsony eo amin'ilay toeran'ny famindrampo. Ho maizina sy hanetroka ary mainty izany. Tsy hanana Mpisolovava intsony ilay fitoera-masina eo, mba handahatra ny raharahantsika amin'izany fotoana izany. Fantatrareo ve fa ny

Soratra no milaza an'izany? Nanetroka ny toera-masina. Tsy nisy Rà teo amin'ny toeran'ny famindrampo, amin'izay fotoana izay dia fitsarana ilay izy.

²⁵ Raha ny Tompo no, indray andro any amin'ny fanombohan'ity fararano ity, hanome antsika hariva vitsy an'ny fifohazana. Efa nataoko tao an-tsaiko mihitsy izany, te-haka an'io Bokin'ny Apokalypsy io aho, ho an'ny fianarana iray eo amin'izany, handeha hitety fotsiny an'io Bokin'ny Apokalypsy io, manohy.

²⁶ Ankehitriny, androany, dia fantatro fa misy maro no tonga, mba hivavahana. Ary nikatona ny biraoko androany, na tamin'ity herinandro ity. Ary tonga ny sasany tamin'ireo olona, nefa tsy nanana anjara iray mba hivavahana, tany, satria lasa ireo zazalahy, nandritry ny iray andro na tahaka an'izany, mba hiala sasatra. Manana asa betsaka hatao izy ireo; ireo asany manokana, miampy ny asan'ny tabernakla, ary ireo antsoko an-telefona sy ny sisa. Mikapoka anareo avy hatrany eo amin'ny hozatrareo izany. Ary noho izany dia izany ilay antony. Fantatro fa tokony hivoaka any ho any aho, matetitetika, ary hanao zavatra hafa, ary fantatro fa izy ireo dia tokony, ihany koa. Noho izany, dia niantso ahy izy ireo. Hoy aho hoe, "Heveriko fa ho mety tsara ilay izy." Ary hivavaka ho an'ny marary isika, afaka fotoana fohy.

²⁷ Ary nieritreritra aho fa hamaky ny sasany avy amin'ny Tenin'Andriamanitra isika. Raha manana ny Baibolinareo ianareo ankehitriny, dia ndao isika hamadika ao amin'ny Bokin'i Isaia. Tiako ny mahita anareo manana ny Bokinareo ka mamaky an'izany. Mamaky aho. . . Raha tsy manana afa-tsy Teny iray na roa fotsiny ianareo izay vakiantsika, dia mbola, Tenin'Andriamanitra Mandrakizay Izany, Tsy mety maty. Tsy mety levona mihitsy Izany. Toko faha-55 an'ny Isaia, ny fotokevitra, "Ny famonjena mandrakizay."

He, ianareo rehetra izay mangetaheta, mankanesa amin'ny rano, ary izay tsy manam-bola; avia ianareo, mividiana; ka mihinàna; eny, avia, mividiana divay. . . ronono nefa tsy amim-bola na amin-karena.

Nahoana ianareo no mandany vola amin'izay tsy mofo? ary ny fisasaranareo amin'izay tsy mahafa-po? henoy tsara mihitsy aho, ka hano izay tsara, dia aoka hiravoravo amin'ny matavy ny fanahinareo.

Atongilano ny sofinareo, ka mankanesa aty amiko: mihainoa, dia ho velona ny fanahinareo; ary hanao fanekena mandrakizay aminareo aho, na dia ny famindrampo azo antoka an'i Davida aza.

²⁸ Tiako ny hiresaka aminareo, mandritry ny fotoana vitsy fotsiny, eo amin'ny lohahevitra: *Tsy Amin-Bola Na Amin-Karena.*

²⁹ Misy betsaka ireo zavatra mamalifaly amin'ny fiainantsika. Misy be loatra mba hamitahana ny olona eo amin'izay hantsointsika hoe “fahafinaretana,” ary ho an'ny olona rehetra izany, ny taona rehetra.

³⁰ Misy ireo fitaka ho an'ireo olona tanora, ireo dihy moderina sy ireo fetin'ny rock-and-roll, sy ny mozika izay ananan'izy ireo izay miaraka amin'izany. Ary famitahana daholo izany, ho an'ny famalifaliana.

³¹ Tsy ahoako hoe tao amin'ny trano tsara toy ny ahoana no nitaizana ankizy iray, ary ahoana no nampianarana azy hanao ny tsara; raha tsy nanaiky ny fahatsapan'ny Fahateraham-baovao io ankizy io, dia tratan'ny mozika rock-and-roll ny fifantohany vantany vao mandre an'izany mihitsy izy. Satria, ao anatin'ny, teraka tao anatin'ny, ara-natiora, ny fanahy ara-nofo iray. Ary tena lehibe ny herin'ny devoly, amin'izao andro izao, hany ka tratan'ny ny fanahin'io ankizy kely io.

³² Ary tsy mihoatra noho izany ve no hataony amin'ny antitra, raha izany, izay nandà ny Fahateraham-baovao! Satria, raha tsy ny fiainanareo irery ihany no niova, ka niova fo ianareo ary nateraka indray, tao amin'ny Fanjakan'Andriamanitra, dia mbola ho avy amin'ireo zavatr'izao tontolo izao foana ny natoranareo, tsy mampaninona na mpivavaka toy ny ahoana ianareo, raha tsy efa niova izany ao anatinareo. Afaka manompo ianareo ary ho mpivavaka, saingy mbola hanana an'ilay karazan-javatra avy amin'ny hery mitarika iray eo aminareo foana izany, satria io olon'ny fahotana tranainy io sy ireo faniriany dia tsy mbola maty ao anatinareo.

³³ Fa avelao Kristy haka an'ilay seza fiandrianana indray mandeha ao am-ponareo, dia tsy hanelingelina ireo zavatra ireo. Tena lehibe loatra ilay izy.

³⁴ Tsy afaka manonona ny anaran'ilay lehilahy aho, satria tsy afaka mieritreritra ny anarany aho ankehitriny, fa maro aminareo no hahatsiaro azy. Milaza izy ireo fa nisy nosy iray izay nandehanan'ireo lehilahy, tao amin'ny fanotrehana iray, ary nivoaka ireo vehivavy, nihira. Ary tena nahasarika tokoa ny hiran'izy ireo, ka ireo tantsambo izay nandalo, tao amin'ireo sambo, dia niditra. Ary tamin'izay fotoana izay ireo miaramila mpiantrika no—no nahatratra an'ireo tantsambo tsy nisy mpiambina, ka namono azy ireo. Ary te-hiala ny lehilahy malaza anankiray. Dia nasainy nofatoran'ireo tantsambony teo amin'ny andrin-tsalazana iray izy, ary—ary—ary nametraka zavatra iray teo amin'ny vavany, mba tsy ahafahany mihiakiaka; ary—ary nametraka fanampenana teo amin'ny sofin'ireo tantsambony, mba tsy ahafahan'izy ireo handre, sy handalo eo, mba handre an'izany. Dia nivoaka ireo vehivavy, nandihy sy—sy nihiakiaka, sy nihira, ary, oh, tena nalaza ilay izy, hany ka naolany ny hoditry ny hato-tànany, nihiakiaka an'ireo tantsambony hoe,

“Mitsofoha! Mitsofoha!” Saingy tsy afaka nandre azy izy ireo, nanana fanampenana izy ireo teo amin’ny sofiny.

³⁵ Ary avy eo dia nisosa teo amin’ny toerana iray izy izay tokony hanesoran’izy ireo ny, na, hamahan’izy ireo ny tanany, sy tokony hanesorany an’ireo fanampenana hiala amin’ny sofiny. Teo, rehefa nandeha teny an-dàlambe izy, dia nandre mpitendry mozika iray faratampony indrindra noho ilay tany, ka rehefa nandalo indray izy, dia hoy izy ireo hoe, “Oh, ry mpirenireny lehibe, hamatotra anao eo amin’ily andrin-tsalazana indray ve izahay?”

³⁶ Hoy izy hoe, “Tsia, avelao fotsiny aho ho votsotra. Nandre zavatra iray tena lehibe kokoa aho, hany ka tsy hanelingelina ahy intsony izany.”

³⁷ Tahaka an’izany ilay izy ho an’ny Kristiana iray nateraka indray. Nahita zavatra tena lehibe kokoa noho ny an’ny rock-and-roll sy ireo famalifalian’ity izao tontolo izao ity izy ireo. Ampifalifalian’ny Fanahy Masina izy ireo. Tena lehibe kokoa izany, hany ka maty izao tontolo izao ho azy ireo.

³⁸ Fa rehefa mandeha ao amin’io famalifaliana mora vidy io ianareo, dia tsarovinareo fotsiny fa tsy maintsy mila vola betsaka ianareo. Ny zazalahy tanora iray izay hitondra ny sakaizany vavy any amin’ireny fety sy fandihizana ireny, sy ny sisa, dia handoa ampahany lehibe amin’ny fidiram-bolany isan-kerinandro. Ary ireo olona antitra izay miezaka hahita fahafinaretana amin’ny fandehanana any amin’ireo trano fisotroan-dabiera, mba handentika an’ireo alahelon’ny herinandrony, dia tsy maintsy handoa vola be izy ireo. Ary inona no azon’izy ireo avy amin’izany? Tsy mahazo afa-tsy aretim-po izy ireo.

³⁹ Ary tsarovy, tsy maintsy handamina an’izany amin’Andriamanitra ianareo indray andro any. “Fa fahafatesana no tambin’ny ota.” Tsy manao na inona na inona ianareo eto antany eto, amin’ny alàlan’izany. Rendrirendry sandoka iray izany. Ny fisotroana dia hanampy alahelo fotsiny ihany. Ny fahotana dia hanampy fahafatesana ambonin’ny fahafatesana fotsiny ihany. Ny sekinareo farany dia fisarahana amin’Andriamanitra, Mandrakizay, ao amin’ny Farihy Afo. Ary tsy afaka mahazo na inona na inona ianareo, fa mahavery.

⁴⁰ Noho izany dia tonga Andriamanitra ka nametraka an’ily fanontaniana hoe, “Nahoana ianareo no mandany ny volanareo amin’ireo zavatra izay tsy mahafa-po? Nahoana ianareo no manao an’izany?”

⁴¹ Inona no manao ny olona hanao an’izany? Mandany an’izay rehetra ananany izy ireo, izay rehetra mety ho azon’izy ireo, mba hividianana fisotro, mba hampikianjo vehivavy iray izay iarahan’izy ireo, na karazana fahafinaretan’izao tontolo izao, fitsiriritana.

42 Fa notenenina isika ao amin'ny Baiboly, ary nodidiana mba hanatona an'Andriamanitra hoe, "Ary mba hivididy fifaliana Mandrakizay sy Fiaianana Mandrakizay, tsy amim-bola na amin-karena."

43 Tsy mety hahafa-po ireo zavatra ireo, ary ny fiafaran'izy ireo dia fahafatesana Mandrakizay. Ary ny vidin'izany dia ny volanareo rehetra izay azonareo vorianana miaraka, mba ho ilay-ilay mpanam-bola goavana na ilay mpamalifaly, na ilay zazalahy mpilalao, na mety ho inona ianareo, na ilay zazavavy malaza, na inona na inona ilay izy. Ny vidin'izany dia izay rehetra azonareo hangonina, mba hanaovana an'izany. Miakanjo amin'ireo akanjo lafo vidy indrindra, ary—ary manao an'ireo zavatra izay ataon'izao tontolo izao, mijinja fotsiny ny sekin'ny fanozonana Mandrakizay.

44 Hoy Andriamanitra, tamin'izay fotoana izay hoe, "Nahoana?" Inona no hataontsika amin'ny Andron'ny Fitsarana, rehefa anontaniana isika hoe nahoana isika no nanao an'izany? Inona no ho valin-tenintsika? Inona no ho valin-tenin'i Amerika moderina, izay milaza fa firenena Kristiana iray izy ireo? Nefa misy vola betsaka laniana ho an'ny whisky, ao anatin'ny taona iray, noho ny misy ho an'ny sakafo. "Nahoana ianareo no mandany ny volanareo amin'ireo karazan-javatra ireo?" Kanefa, ilay governemanta dia handefa anareo any am-ponja, ho an'ny dimy dolara natokana ho an'ny hetra izay nalefanareo angamba tany amin'ny toerana iray izay tsy tafapetraka ara-dalàna mba handray hetra, mba handefasana misionera vitsivitsy any ampitan-dranomasina. Ho anontaniana isika indray andro any hoe, "Nahoana ianareo no nanao an'izany?"

45 Firenena Kristiana iray isika, ary miliara no nalefa tany amin'ireo olona any ireo, izay ezahantsika ho vidiana ny fiombonany. Ankehitriny dia lavin'izy ireo izany. Tsy mahagaga raha hoy i Khrushchev hoe, "Raha misy Andriamanitra iray, dia hamafa ny Lapany hadio indray Izy." Afaka manao fanambarana tahaka an'izany ireo mpanompo sampy, mba hitondra henatra eo amintsika. Zavatra mahamenatra toy ny inona izany! Nefa isika dia miantso ny tenantsika ho Kristiana.

46 Hoy Andriamanitra hoe, "Avia, mividianana Fiaianana Mandrakizay, tsy amim-bola, tsy amin-karena." Fiaianana, mba hiaina mandrakizay, nefa manodina ny lamosintsika eo amin'izany isika ka mihomehy eo amin'ny Tavany. Inona no hataontsika amin'io Andro io? Inona no hisy . . . ?

47 Raha manome zavatra antsika mba hatao Andriamanitra, sy manome vola antsika, ka manao antsika ho ilay firenena mpanan-karena indrindra eto ambanin'ny lanitra, amin'izay fotoana izay dia hanontany Andriamanitra hoe nataontsika inona izany. Nahoana isika no mandany ny volantsika amin'ireo zavatra izay tsy mahafa-po? Tsy ho an'ny firenena iray ihany, fa ho an'ny isam-batan'olona izany; avy amin'ny

iraimbilanja, hatrany amin'ny an-tapitrisany dolara, izay nomena ny tsirairay avy.

⁴⁸ Rehefa nifamono ireo lehilahy: Namaky lahatsoratra iray aho vao tsy ela mihitsy, izay nisy zazalahy roa niasa tao amin'ny tobim-pihazana iray. Ny anankiray nanana zanaka dimy, ary ilay iray hafa nanana roa. Ary tsy maintsy horoahina ny iray tamin'izy ireo. Ary ny iray tamin'ireo zazalahy izay nanana zanaka roa, na nanana zanaka dimy, dia nahatsapa fa nila asa betsaka noho ilay anankiray niaraka tamin'ny zanaka roa izy; dia nandeha nihaza niaraka taminy izy, ary notifiriny tao amin'ny lamosina izy.

⁴⁹ Vola, izany ilay karazana firenena, izany ilay karazana fihetseham-po, izany ilay karazana fanahy izay manapaka ny olona.

⁵⁰ Noho izany dia afaka mahita ianareo hoe zava-dehibe toy ny ahoana no tokony haha-izy ny Fahateraham-baovao. “Tsy maintsy hateraka indray ianareo.” Tsy maintsy. “Mankanesa aty Amiko, ka mividiana tsy amim-bola.”

⁵¹ Tsy afaka milaza ianareo hoe, “Tsy nanam-bola aho.” Tsy mila vola mihitsy ianareo. Omena maimaim-poana izany.

⁵² Isika Amerikana dia mirona handoa ny anjarantsika ho an'ny zavatra rehetra. Izany no dokam-barotsika. “Mandoa ny anjaranay amin'ny zavatra rehetra izahay. Manam-bola izahay.” Mampamirapiratra ny ravin-dolarantsika any amin'ireo firenena hafa, sy ny sisa, izay mahantra. Miditra, mahita an'ireo mpizaha-tany miditra ianareo, ny rehetra ao anatin'ny volom-borona sy tsara tarehy. Manatitra sakafo ho azy ireo ny Amerikana. Io karazan-javatra io dia fidiraim-bola maloto eo imason'Andriamanitra. Tsy hividy ny lâlantsika mankany Andanitra izany. Fa ny zavatra rehetra eto Amerika, dia tsy maintsy mandoa ny anjarantsika isika.

⁵³ Mandeha mankany amin'ny trano fisakafoana ianareo, ary mihinana ny sakafonareo hariva. Ary raha tsy mametraka vola eo ambonin'ilay latabatra ianareo, ho fanomezana ho an'ilay mpandroso sakafo, dia misy fikentronana iray tonga eo amin'ny tavany, nefa dia karamain'ilay orinasa izay iasany izy. Ary ny tsaratsara kokoa dia fara-fahakeliny ny folo isan-jato, na mihoatra, an'ny faktioranareo. Raha tsy manao ianareo, dia hijery anareo ho toy ny mahidy iray ilay mpahandro sakafo na karazana ma-mahihitra iray. Nefa, mahazo ny volany izy. Heveriko fa fahafaham-baraka iray sy henatra iray izany, ny manao an'izany. Heveriko fa fitsarana mampalahelo eo amin'ny firenena izany. Taloha, ireo olona tsara, ireo toerana tsara, dia tsy namela an'izany. Saingy lasa ao anatin'ny fanahy goavana iray izany rehetra izany.

⁵⁴ Nandeha teo amin'ny dia iray aho, teo amin'ny fiaran-dalamby iray. Ary mpitondra entana iray...Nanana valizy

fohy iray aho teo amin'ny tàmàna iray, valizy iray teo amin'ny ilany, ary ilay fitaovam-piharatako teo ambanin'ny sandriko, dia nandeha. Nanatona ilay mpitondra entana, nanao hoe, “Afaka mitondra azy ho anao ve aho?”

55 Hoy aho hoe, “Oh, handeha etsy amin'itsy fiaran-dàlamby itsy fotsiny aho, tompoko. Misaotra anao, betsaka tokoa.” Saiky teo amin'ny, oh, telopolo yards teo.

56 Hoy izy hoe, “Ho entiko izy,” dia nalainy ilay zavatra kely ka nentiny, ary nandeha.

57 Eny, rehefa nandroso izy, dia nieritreritra aho hoe angamba aho . . . Fantatro fa karamaina izy, saingy hanome azy fotsiny aho ny—hanome azy antsasaky ny dolara iray. Nanana ho fananany angamba izy, an'ireo entako, nandritry ny teo amin'ny, atao hoe, iray minitra; saiky hatreto ka hatrany amin'ny fiaran'ity tabernakla ity, no nandehanany teo amin'ny fiaran-dàlamby. Niakatra tao amin'ilay fiaran-dàlamby aho, aloha, ary niondrika ka naka an'ilay izy. Nomeko antsasaky ny dolara izy.

Hoy izy hoe, “Iray minitra fotsiny!”

Hoy aho hoe, “Inona ilay izy, tompoko?”

Hoy izy hoe, “Nitondra entana telo aho ho anao!”

Hoy aho hoe, “Eny, tompoko, marina izany. Inona, inona no tsy mety?”

58 Hoy izy hoe, “Ny karamako kely indrindra dia dimy amby roapolo cents ny entana iray. Ananako dimy amby roapolo cents hafa ianao.”

Hitanareo, izany no Amerikanisma, ny zavatra rehetra dia tsy maintsy aloa.

59 Mandehana ianareo ao anatin'ny fiaranareo ka avelao izy hilatsaka ao anatin'ny hady, dia makà olona hisintona anareo ao. Tsaratsara kokoa aminareo ny vonona handoa, satria hampandoa anareo amin'izany izy. Tonga ny mpamonjy voina iray ka maka anareo, hampandoa anareo betsaka tokoa isaky ny maily iray izy. Ary raha ilay mpiompy, in-tsivy amin'ny folo, no mamoaika ny trakiterany, dia ho ratsy lavitra noho izany.

60 Tsy maintsy mandoa ny zavatra rehetra izay nataonareo ianareo. Ny zavatra rehetra dia “Mandoava! Vola! Mandoava! Vola!”

61 Kanefa lehibe kokoa toy ny ahoana ny hady nanipazan'ny fahotana anareo! Iza no mba afaka hamoaka anareo avy ao amin'ny hadin'ny fahotana? Fa mamoaika anareo avy ao amin'ny hadin'ny fahotana Andriamanitra, tsy amim-bola, tsy amin-karena, nefa tsy misy anankiray afaka mamoaika anareo.

62 Raha tsy mandoa tsara an'ilay mpamonjy voinanareo misintona ianareo, dia hijanona ao anatin'ilay hady. Tsy maintsy

manana an'ilay vola ianareo raha tsy izany dia mijanona ao anatin'ilay hady.

⁶³ Fa ny hady ratsy indrindra izay hany nisy anareo, dia izay nanipazan'ny devoly anareo, ny hadin'ny fahotana sy ny tsi-finoana. Andriamanitra no hamoaka anareo an-tsitrapo, tsy amim-bola, tsy misy vidiny. Kanefa dia mipetraka ao anatin'ilay hady ianareo, mihosinkosina amin'ilay fahotana fotsiny, nefa dia tsy miantso Azy akory aza.

⁶⁴ Rehefa mampiantso an'ilay mpamonjy voina ianareo, mazàna dia mametraka rojo goavana be mandeha midina mankany amin'ilay hady izy ireo, mamatotra azy manodidina an'ilay arom-pifandonana sy ny sisa, ary manomboka manodina. Dia manomboka misintona ny herin'ilay fiara, ary handeha ireo motera, dia hisintona anareo hivoaka.

⁶⁵ Rehefa mahita anareo ao anatin'ny hadin'ny fahotana Andriamanitra, ka mandre anareo miantso Azy, dia mampidina rojo iray Izy izay mifatotra manodidina an'i Kalvary, ilay fitiavan'Andriamanitra, ka mampifikitra an'Izany eo amin'ny fonareo, ary mametraka ny Herin'ny Fanahy Masina eo, mba hanomboka hisintona. Ary tsy mandoa na inona na inona amin'izany ianareo. Kanefa dia mipetraka ao amin'ilay hady isika satria tsy afaka mandoa an'izany amin'ny paosintsika. Mihevitra isika Amerikana fa afaka mandoa an'izany avy amin'ny paosintsika isika, saingy tsy afaka ianareo. Ilay izy dia tsy amim-bola na amin-karena. Tsy mandoa an'izany any am-piangonana ianareo. Jesosy no efa nandoa an'izany teo Kalvary. Saingy menatra an'Izany ny olona. Tian'izy ireo amin'ny fombany Izany. Manana làlana iray hahazoanareo an'Izany Andriamanitra, ary maimaim-poana Izany raha haka an'Izany ianareo.

⁶⁶ Mazàna, rehefa misintona anareo hivoaka avy ao amin'ny hady izy ireo, dia feno ratra tanteraka ianareo, tsy maintsy mandeha ianareo, any amin'ny hopitaly. Ary alohan'ny hanombohan'izy ireo hiasa eo aminareo, alohan'ny hahavitan'ny zavatra anankiray, dia manontany izy ireo hoe, "Iza no handoa ny faktiora? Raha hanajitra an'ireo fery izahay, raha handraraka diloilo izahay, ka hanome tsindrona mba—mba hanaovana vaksiny anao tsy ho tratry ny poizina ao amin'ny rà, dia inona no karazana fiantohana anananao?" Alohan'ny hanaovan'izy ireo zavatra anankiray, dia tsy maintsy vola no eo amin'ny laharana.

⁶⁷ Fa rehefa mametraka ny Rojom-pitiavany manodidina ny fonareo ny Tompontosika, ka misintona anareo avy ao amin'ny hadin'ny fahotana, dia manasitrana ny fo torotoro rehetra Izy, manaisotra ny fahotana rehetra. Ary ilay faktiora dia efa natao any anatin'ny ranomasin'ny fanadinoina, mba tsy ho tsarovana aminareo intsony. "Avia, tsy amim-bola na amin-karena." Tsy mampaninona na naratra mafy toy ny ahoana aza ianareo,

torotoro mafy toy ny ahoana ianareo, toy ny ahoana no nataon'ny fianakavianareo, na izay nataonareo, tsy misy faktiora ny amin'izany. Manasitrana ny aretim-po Izy, manaisotra ny alahelonareo rehetra. "Izy dia voalefona nohon'ny fahotantsika, notorotoroina nohon'ny helotsika; ny famaizana ho an'ny fiadanantsika dia natao teo Aminy; ary tamin'ny Dian-kapony no nahasitrana antsika." Maimaimpoana daholo izany.

⁶⁸ Ary tsy handray an'Izany isika, satria voafehin'ny fanahy diso. Voafehin'ny fanahin'ny firenena iray isika, ny fanahin'izao tontolo izao, raha tokony ho voafehin'ny Fanahin'Andriamanitra, ny Fanahy Masina, izay mitarika antsika sy mitari-dàlana antsika any amin'ny Fahamarinana rehetra, ary manao ny Baiboly ho toy izany.

⁶⁹ Indray andro lasa, niresaka tamin'ny tsi-mahatoky iray aho. Hoy izy hoe, "Eritrreto izany, Atoa. Branham. Ity fahorian'ny fiainana rehetra ity, ary ny zavatra tokana izay ananantsika, izay nahavonjy antsika, dia soratra Jiosy tranainy vitsivitsy."

⁷⁰ "Oh," hoy aho, "tompoko, izany ihany no mety anananao, fa izaho dia manana zavatra mihoatra an'izany. Manana ny Fanahin'ilay Anankiray izay nanoratra an'Izany aho, izay manamarina Azy sy manao Azy ho tahaka an'izany, ny teny fikasana rehetra." Tsy hainy hoe ahoana no handraisana an'izany.

⁷¹ Hitanareo, tsy maintsy tonga ianareo ary mividy tsy amim-bola, mividy tsy amin-karena. Tsy misy vidiny izany na inona na inona. Maimaim-poana izany ho an'ny "izay rehetra mila, aoka izy ho avy." Misintona anareo avy ao amin'ny hady Andriamanitra.

⁷² Tahaka an'ilay lehilahy teo amin'ny vavahady nantsoina hoe Itsaraendrika. Efa tao anaty hady izy, hatrany an-kibondreniny, nohon'ny devoly izay nampandringa azy teo amin'ny tongony. Ny fomba fivelomany dia niangavy fiantrana tamin'ny olona izay nandalo. Ary raha nipetraka teo amin'ny vavahady izy tamin'io maraina io, dia nahita mpitory teny pentekotista roa tonga izy. Tsy nisy folo cents iray teo anivon'izy ireo, satria hoy izy hoe, "Tsy manana volafotsy aho." Ary ny folo cents iray no vola madinika volafotsy kely indrindra. "Tsy manana volafotsy sy volamena aho."

⁷³ Ataoko fa nieritreritra zavatra iray tahaka an'izao ilay lehilahy. "Tsy misy ilaina ny handraisana ny kapoakako." Angamba efa niezaka ny hitahiry vola betsaka izy. Efaolo taona izy, ary angamba efa niezaka ny hitahiry vola betsaka izy, afaka nanamboatra tehina iray ho azy ireo mpitsabo, hamindrana, satria, izy, tao amin'ny kitrokeliny no nampahalemy azy. Ary angamba tsy maintsy nila vola izy, apetraka eo amin'ilay laharana, alohan'ny hanomezan'ireo mpitsabo fanohanana iray ho azy. Ary azo antoka fa tsy misy ilaina ny hihazonana ny

kapoakany eo amin'ireto mpitory teny pentekotista izay tsy nanana na inona na inona ireto. Ilay fanararaotra, izy ireo no . . . tena nahantra, amin'ny mba ahafahana hahita iraimbilanja iray avy amin'ireto lehilahy ireto.

⁷⁴ Fa rehefa nibanjina ny tavan'izy ireo izy! Ny anankiray, tanora sy teramenan'ny hatanorana; ilay iray hafa, antitra sy nikentrona; raha Jaona . . . raha nandeha teo amin'ny vavahady i Petera sy Jaona. Nahita zavatra izy tao amin'io lehilahy tanora io. Izany hoe, ilay fiteramena dia lehibe kely kokoa noho ny nahazatra. Hitany fa tany ankoatr'ireo fikentronana sy fiahiana, nohon'ny masoandron'i Galilia izay nandoro ny tavan'ilay mpanjono antitra, dia nisy "fifaliana tsy hay lazaina, sy feno voninahitra." Nahita zavatra izay toa samihafa kely izy.

⁷⁵ Fantatrareo, misy zavatra mikasika ny Kristianisma, izay manao ny olona ho lasa samihafa. Izy ireo no olona tsara tarehy indrindra eto amin'izao tontolo rehetra izao.

Dia naka ny kapoakany izy ary nakisany izany.

⁷⁶ Ary ny apostoly Petera, satria zokiny indrindra, dia nanao hoe, "Tsy manana volafotsy sy volamena aho." Amin'ny teny hafa dia, "Tsy afaka manampy anao mihitsy aho, mba hividiana an'ireo tehina ireo. Tsy manana volafotsy sy volamena aho, fa izay ananako!" Tsy maintsy efa nividy Taminy izay nanana tantely sy ireo fifalian'ny divain'ny famonjena izy. Vao tonga fotsiny izy, roa na telo andro talohan'io, avy tany amin'ny Pentekosta, izay nisy zavatra nitranga.

⁷⁷ Dia nitsambikina niaraka tamin'ny "amena" goavana be tamin'izany ilay lehilahy tanora, ka nijery teo amin'ny tavany.

⁷⁸ Inona no nitranga? Io rojon'ny fangorahana io, ny fangorahan'ilay nanao hoe, "Manana fangorahana eo amin'ny marary Aho," io Fanahy iray io ihany no naka toerana tao ampon'ilay mpanjono antitra. Hoy izy hoe, "Raha vola, dia tsy manana aho, fa manana zavatra izay haka ny toerany aman-tapitrisany aho. Izay ananako!"

⁷⁹ Tsarovy ankehitriny, Jiosy iray i Petera, ary tia vola izy ireo, ara-natiora, saingy ity Jiosy ity dia efa niova fo. Tsy hoe, "Izay ananako, no amidiko aminao."

⁸⁰ Fa, "Izay ananako, no omeko anao! Izay ananako! Tsy manana iraimbilanja aho ato anatin'ny paosiko. Tsy afaka mividy mofa iray aho. Tsy afaka mividy na inona na inona aho. Tsy manana cent iray aho. Fa raha afaka mandray an'izany ianao, izay ananako, no homeko anao satria nomena ahy izany." Izany no ilaintsika. "Izay ananako, no omeko anao."

"Inona no anananao, tompoko?"

⁸¹ "Efa tany amin'ilay mivarotra ronono sy tantely aho, tsy tamin-karena. Homeko anao Izany. Tsy mandoa na inona na inona amiko ianao ho an'Izany. Raha afaka mandray an'Izany

ianao, dia homeko anao Izany. Tsy tahaka ny anankiray izay hampandao, fa ireo izay hanome.”

⁸² Satria, “Satria nomena maimaim-poana ianareo, dia manomeza maimaim-poana.” Izany no fanirahan’ny Tompony, telo andro fotsiny talohan’io. “Mandehana any amin’izao tontolo rehetra izao, mitoria ny Filazantsara. Izay mino sy hatao batisa no hovonjena; fa izay tsy mino no hohelohina. Izao famantarana izao no hanaraka an’ireo izay mino: Handroaka devoly amin’Ny Anarako izy ireo; hiteny amin’ny fiteny vaovao izy ireo; raha misotro zava-mahafaty izy ireo, dia tsy hampaninona azy ireo izany; raha mandray menarana izy ireo, dia tsy hanelingelina azy ireo izany. Satria nomena maimaim-poana ianareo, dia manomeza maimaim-poana.” Efa niova io Jiosy io. [Mandondona in-efatra ny polipitra Rahalahy Branham—Mpand.]

⁸³ Ny ilaintsika eto Amerika dia fanovàna iray, avy amin’ny Fanahy Masina haka ny toeran’ireo fombafombampivavahantsika. “Satria nomena maimaim-poana ianareo, dia manomeza maimaim-poana.”

⁸⁴ “Izay ananako, no omeko anao: Amin’ny Anaran’i Jesosy Kristy avy any Nazareta, mitsangàna ary mandehana”; finoana tao amin’io Anaran’ny Mpamorona tsy nifangaro io! Tsy mahagaga raha lasa niantsambotra sy nitsambikina izy, ary nidera an’Andriamanitra!

⁸⁵ Oh, fantatrareo ireo zavatra lehibe, mety efa nipetraka teo nandritry ny efaolo taona angamba izy, niezaka ny hahazo vola ampy hividianana tehina sasany ho azy, saingy tsy afaka nanao an’izany izy. Fa teo amin’ily toerana tena tsy nampoizina indrindra mihitsy, ary ny fotoana tsy nampoizina, ary ilay vahoaka tsy nampoizina indrindra, tsy manana ny ampy, no nahazoany an’izay nilainy. Tena faly aho fa tahaka an’izany no anaovan’Andriamanitra an’ily izy.

⁸⁶ Fa andiana mody antsoina holly-rollers, kely iray indray hariva, no nahitako an’izay nilaiko, izay tsy azon’ny vola novidiana. Tao anatin’ny andiana vahoaka tsy mahay manoratra iray, tsy nianatra, mahantra fitafy, ireo Mainty, eo ampanombohana, tany tao anatin’ny bara tranainy kely iray novaina, teo amin’ny gorodona, no nahitako vidiny iray, vatosoa iray; rehefa nijery teo amin’ny tavako ilay antitra mainty hoditra, ka nanao hoe, “Efa noraisinao ve ny Fanahy Masina fony ianao vao nino?” Oh, Izany no zavatra iray izay nilaiko. Tsy nanampò ny hahita an’Izany teo anivon’ireo olona ireo aho, saingy izy ireo no nanana an’izay nilaiko.

⁸⁷ Ny U.N. androany, tsy hanaiky an’izay ananantsika izy ireo, saingy izany no ilain’izy ireo. Khrushchev, ny sisa rehetra amin’izy ireo, dia mila an’i Kristy, amin’ny batisan’ny Fanahy Masina. Izany no hanova ny toetran’izy ireo. Izany

no hanao lehilahy, izay halan'izy ireo, ho lasa rahalahy. Izany no hanaisotra ny hatendan-kanina, sy fo lentika ary fifandrafiana; ka hametraka ny fitiavana sy fifaliana, sy fiadanana, fahatsaram-panahy sy famindrampo.

⁸⁸ Eny, ao amin'ireo toerana tsy nampoizina, indraindray no ahitanareo an'izay tadiavinareo.

⁸⁹ Inona no ho nomen'ireo zanak'Isiraely (ireo harenan'i Egipta rehetra) rehefa nivoa-drà ny molotr'izy ireo, rehefa nihantona teo amin'ny vavany ny lelan'izy ireo? Ho nanome ny volamena rehetra izay nalain'izy ireo tamin'ny Egiptiana izy ireo, ho an'ny rano mangatsiaka tsara iray. Ny mpitarik'izy ireo tany an-efitra dia efa nitarika azy ireo avy tamin'ny dobon-drano nankany amin'ny dobon-drano, avy tamin'ny hady nankany amin'ny loharano, saingy maina izy rehetra.

⁹⁰ Tamin'izay fotoana izay dia tonga ny, tsy amim-bola na amin-karena! Niteny tamin'ilay mpaminany ny Feo ka nanao hoe, "Mitenena amin'ny vatolampy," ilay zavatra maina indrindra tany an-efitra, ilay zavatra lavitry ny rano indrindra. Teo no afaka ny hetahetan'izy ireo, tsy amim-bola na amin-karena. "Mitenena amin'ny vatolampy." Tsy hoe mandoava amin'ny vatolampy, fa "mitenena amin'ny vatolampy."

⁹¹ Mbola Izy no Vatolampy izao hariva izao. Izy no Vatolampy iray ao amin'ny tany mahasasatra. Raha manao dia ao amin'io tany mahasasatra io ianareo, dia mitenena amin'ny Vatolampy. Tsy mila mandoa Aminy; mitenena Aminy. Ary Izy no fanampiana iray manatrika foana mihitsy amin'ny fotoan'ny olana. Raha marary ianareo, dia mitenena amin'ny Vatolampy. Raha mararim-pahotana ianareo, dia mitenena amin'ny Vatolampy. Raha sasatra ianareo, dia mitenena amin'ny Vatolampy.

⁹² Hitanareo, ilay izy dia toy ny hoe nisy tany ho any . . . Ilay izy dia toy ny hoe, raha tsy nisy rano tany amin'ireo toerana kely izay nisy loharano, dia tsy ho nisy rano teny amin'io tendrombohitra io, avy amin'ny vatolampy. Andriamanitra dia manao zavatra lavitra an'izay eritreretin'ny olona. Ny vatolampy, ilay toerana maina indrindra any an-efitra, saingy hoy Izy hoe, "Mitenena amin'ny Vatolampy."

⁹³ Amin'izao andro izao, dia tena voafitaka ny olona. Mihevitra izy ireo fa raha afaka handeha dia hilaza ny vavak'izy ireo, handoa amin'ny pretra iray mba hilaza vavaka fohy ho azy ireo, mandoa ny fidiran'izy ireo. Raha hanorina fiangonana goavana iray any ho any izy ireo, ka hisy lehilahy manan-karena iray hanohana an'izany, mandeha miaina ao anatin'ny fitsiriritana, manana olon-kafa iray hivavaka ho azy, dia mihevitra izy fa izay ilay izy. Tsy mila ny vola malotonareo Andriamanitra. [Mandondona intelo ny polipitra Rahalahy Branham—Mpand.] Ny zavatra ilainy dia ny fanoloran-tenanareo sy ny fiainanareo

hiteny Aminy. Nanome vola anareo Andriamanitra, aza laniana amin'ireo zavatra izay tsy mahafa-po izany. Lanio amin'ireo zavatra izay mahafa-po izany. Fa mba hitondra ny tena fahafaham-po, tsy afaka hahazo an'izany ianareo raha tsy miteny amin'ny Vatolampy.

⁹⁴ Izy no namokatra an'ireo rano mpanome aina, tsy amim-bola na amin-karena. Ary nisotro izy ireo, dia nisotro ny ramevan'izy ireo, dia nisotro ny zanak'izy ireo, nefa mbola loharano iray mikoriana any an-efitra foana izany.

⁹⁵ Ary toy izany Izy ilay Vatolampy androany, ao amin'ity tany mahasasatra ity, ho an'ny vahoaka iray miha-levona. “Izay mino Azy dia tsy ho levona, fa manana Fiainana Mandrakizay.”

⁹⁶ Mariho. Isan-kariva, dia tsy nila nanontany nikasika ny mofo izy ireo. Nentina teo amin'izy ireo ny mofony, isan-kariva, vaovao.

⁹⁷ Mandeha isika amin'izao andro izao maka mofo iray. Raha mpangataka iray ianareo, ka mandeha eto amin'ilay magazay eto, ary manao hoe, “Mila mofo iray aho.”

⁹⁸ Hilaza izy hoe, “Asehoy ahy, aloha, ny ampahefany anao. Tsy maintsy mahazo dimy amby roapolo cents aho ho an'io mofo iray io.”

⁹⁹ Ary inona no azonareo rehefa mahazo an'izany ianareo? Sakafo kely iray izany, saingy mahazo ny ambany indrindra izay azon'ny vary novokarina ianareo. Esorin'izy ireo ny—ny vitamina rehetra hiala amin'izany, ny ampombo rehetra, ary omeny ny kisoa izany. Afangarony ny andiana koba izay mihazona an'ilay ampombo miaraka, dia manivana azy, ary manao mofo iray, manao azy miaraka amin'ny tàmàna maloto, feno loto, imbetsaka. Jereo izay hitanareo ao anatin'ny mofonareo, indraindray, singam-bolo, sy zavatra ratsy, ary poti-damba, sy ny zavatra hafa izay milatsaka ao amin'ireo fandrahoana mofo ireo. Olona mpanota miaraka amin'ireo aretim-pananahana, sy ny sisa, no manafangaro an'izany ao. Raha hitanareo ny fanaovana azy, dia tsy hihinana azy akory aza ianareo. Ary, kanefa, dia mandoa ny dimy amby roapolo cents anareo ianareo fa raha tsy izany dia tsy mahazo azy.

¹⁰⁰ Ary Andriamanitra no namahana azy ireo isan-kariva, tamin'ny mofo namboarin'ny tàmàna Anjely; tsy amim-bola, tsy amin-karena. Ary, androany, io mofo io dia naneho an'i Kristy, Fiainana ara-panahy, nidina avy tany An-danitra, mba hanome Ny Ainy.

¹⁰¹ Ary Andriamanitra dia manome ho an'ny Zanany, isan'andro, fahatsapana vaovao iray. Tsaroanareo, rehefa nitahiry an'ilay mofo naharitra izy ireo, dia lò izany.

¹⁰² Mandre olona iray ianareo miresaka mikasika ny hoe, “Eny, izaho manana...hoteneniko aminao. Loterana aho.

Presbyterana aho, Batista. Pentekotista aho,” mofa tranainy iray nataon-tànana fotsiny izany. Izay ihany ny amin’io, feno loto fotsiny, ary namboarin’ny tàmnan’olona.

¹⁰³ Fa rehefa mandre fahatsapana iray an’ny fanambarana iray ianareo, vaovao hoe, “Androany maraina, tao amin’ny vavaka, dia nanao batisa vaovao ny fanahiko ny Fanahy Masina,” oh, rahalahy, izany no Sakafon’Anjely. Mamahana azy ireo vaovao Izy, isan’andro, avy any An-danitra.

Ranonoram-pitahiana no ilaintsika.
Milatsaka manodidina antsika ny andon’ny
famindrampo,
Fa ireo ranonorana no iangaviantsika.

¹⁰⁴ Oh, eny, ampidino avy any An-danitra, ny vaovao iray, Tompo, Kristy ilay Mofon’Aina. Atsipazo ao am-poko Izany, ka aoka aho hankasitraka Ny Fanatrehany lehibe.

¹⁰⁵ Azo antoka, nankasitraka izy ireo. Nankasitraka izy ireo. Ary ny lehilahy rehetra na vehivavy izay nateraky ny Fanahin’Andriamanitra, ka mandray ny Fanahy Masina, dia hankasitraka foana. Tsy mampaninona izay mitranga, fa hankasitraka ianareo.

¹⁰⁶ Tahaka an’ily zazalahy kely, jamba teny an-tendrombohitra, Benny kely, teraka izy. Teo amin’ny valo volana teo, dia nanomboka nitombo nanerana ny masony ireo kiramaso. Nahantra ireo raiamandreniny. Nipetraka teny amin’ny ilan’ny havoana tranainy feno tanimanga iray izy ireo. Ary fantatr’izy ireo fa ireo fandidiana ireo no afaka hamonjy ny mason’i Benny kely, mba ahafahany mahita. Zazalahy iray eo amin’ny roa ambin’ny folo taona eo izy ankehitriny. Ireo raiamandreniny dia afaka nahazo fotsiny an’izay ampy hahazoana ny mofon’izy ireo sy ny sakafo ho an’ny taona. Tsy afaka nisahana an’ily fandidiana izy ireo.

¹⁰⁷ Ireo mpiara-monina rehetra, niaraka, dia nahita an’i Benny kely niezaka nilalao niaraka tamin’ireo ankizy kely tany, jamba. Tsy afaka nahita an’izay nataony izy. Nalahelo izy ireo. Ary ny tsirairay avy, tamin’io taona io, dia nametraka tahiry kely amboniny avy tamin’ny vokatra. Niasa mafimafy kely kokoa izy ireo teo amin’ily fihiratan’ny masoandro. Ary rehefa lafo ireo vokatra amin’ny fararano, dia nentin’izy ireo ny vola ary napetrany tao amin’ny fiaran-dàlamby i Benny kely, ary nentiny tany amin’ny dokotera izy.

¹⁰⁸ Nahavita tsara an’ily fandidiana izy ireo. Ary rehefa niverina izy, dia niangona ireo mpiara-monina rehetra rehefa nivoaka ny fiaran-dàlamby i Benny kely. Ireo masony kely, nangirana dia namiratra. Nanomboka niantsoantso sy nitomany izy, raha nijery ny tavan’izy ireo.

¹⁰⁹ Hoy ny iray tamin’ireo mpamily hoe, “Anaka, ohatrinona no vidin’io fandidiana io tamin’io?”

110 Hoy izy hoe, “Ramose, tsy fantatro izay vidiny ho an’ireo olona ireo. Fa tena faly aho fa afaka mahita ny tavan’izy ireo, izay nandoa an’ilay vidiny.”

111 Tahaka an’izany no tsapantsika. Tsy fantatro izay vidin’Izany ho an’Andriamanitra. Fantatro fa Izy no nanome ahy ny tsara indrindra izay Nananany, Ny Zanany. Fa tena mankasitraka aho ny manana an’ity fahitana ara-panahy ity, mba ahafahako mahita ny Tavany ka mahafantatra fa maty ho ahy Izy. Tsy fantatro ny vidin’Izany ho Azy. Tsy manana fomba hanombanana an’izany isika. Lehibe loatra ilay vidiny. Tsy afaka miteny aminareo aho hoe ahoana ilay izy. Fa mankasitraka aho. Mankasitraka aho, fa, tamin’izany dia jamba aho fahiny, fa afaka mahita aho ankehitriny.

112 Mankasitraka aho fa rehefa niteny tamiko Mayo Brothers fa tapitra ny fotoako, rehefa niteny tamiko ireo dokotera fa tsy afaka ny ho velona ela intsony aho, dimy amby roapolo taona lasa izay, dia velona aho androany. Tsy fantatro hoe ohatrinona ny vidin’izany ho an’Andriamanitra, fa mankasitraka aho fa velona.

113 Mpanota iray aho fahiny, voafatotry ny fahotana, niaraka tamin’ny aretim-po, natahotra fahafatesana. Fa, androany, dia ny fahafatesana no fandreseko. Haleloia! Hitondra ahy fotsiny ihany eo amin’ny Fanatrehan’Ilay tiako izany, mba ahafahako mijery ny Tavany. Izy no nanova an’ilay zavatra, tamin’ny alàlan’ny fandidiana iray, Izy no naka ny foko ka nanao azy ho vaovao. Fantatro fa nisy zavatra nitranga tamiko.

114 Tao amin’ny gazety iray tamin’ny fararano lasa, tany Minnesota, dia nisy zazalahy kely iray izay nitondra ny bisikiletiny ka nandeha nankany am-piangonana indray maraina, ho any amin’ny sekoly Alahady. Lehilahy tanora hafa iray tao amin’ny mpiara-monina, tsy niraharaha ny amin’ny sekoly Alahady izy, nentiny ny sakaizany vavy dia nanao korisarisa. Ary ilay lehilahy dia lehilahy lehibe iray, ka niditra teo amin’ny ranomandry manify izy ary nianjera. Nihomehy an’ilay zazalahy kely izy tamin’io maraina io raha nandeha teo amin’ny lâlana izy, niteny tamin’ilay sakaizany vavy, nanao hoe, “Iny no andiana fanatika iray izay mankany amin’itsy fiangonana itsy.” Ary rehefa nianjera teo amin’ilay ranomandry izy, dia lavitra azy ilay sakaizany vavy. Maivana izy; lasa izy nanalavitra. Fa rehefa niharina izy ka nametraka ny sandriny teo amin’ny ranomandry, dia nalemy izy, ary nihantona teo ambonin’ilay ranomandry.

115 Niezaka ny hamoaka azy ny sakaizany vavy, saingy mavesatra loatra izy, nopotehiny ilay ranomandry. Nihiaikiaka taminy izy hoe, “Mihemora! Mihemora! Hianjera fotsiny ianao, ary hilentika isika roa.” Nihiaikiaka izy, nitomany izy, fa tsy nisy na inona na inona hanampy azy.

¹¹⁶ Afaka kelikely, teo an-tampon'ny havoana, no tonga ny bisikiletely kely iray, nivoy, zazalahy kely iray niaraka tamin'ny Baiboly iray teo ambanin'ny sandriny. Nandre an'ireo hiakiaka izy, ka nampandeha haingana ny bisikiletiny. Napetrany ny Baiboliny, ary nihazakazaka teo amin'ilay ranomandry izy. Nandady tamin'ny kibony kely, niaraka tamin'ireo akanjony tsara teny aminy, mandra-pahazoany ny sandrin'ilay lehilahy, ary nanohy nisintona azy, mandra-pamoakany azy avy tao amin'ilay ranomandry. Nihazakazaka izy ary nanofahofa fiara iray. Niantso fiara fitatera-marary iray izy ireo ary nitondra azy nankany amin'ny hopitaly.

¹¹⁷ Rehefa avy nandeha izy ka nandoa an'ilay fiara fitatera-marary, nandoa an'ireo dokotera nohon'ny tsindrona miady amin'ny aretin'avokavoka sy ny sisa tokony ho azony, dia nanatona an'ilay zazalahy kely izy. Hoy izy hoe, "Anaka, inona no tokony aloako aminao?"

Hoy izy hoe, "Tsy misy na inona na inona."

¹¹⁸ Hoy izy hoe, "Anananao ny aiko aho." Eritrereto izany. Tsy afaka nandoa an'izany ny vola. Ny ainy izany.

¹¹⁹ Tahaka an'izany no tokony ho tsapantsika manoloana an'Andriamanitra. Tsy hoe mividy ny lalantsika amin'ny zavatra iray; fa ananan'Andriamanitra ny aintsika isika, satria eo am-pahafatesana isika ary milentika ao anatin'ny hadin'ny fahotana. Nanatsotra ny Sandriny Andriamanitra ary namihina ahy manodidina.

Nilentika lalina tao anatin'ny fahotana aho,
Lavitra an'ilay morona feno fiadanana,
Tena voapentimpentina lalina ny tao anaty,
Nilentika mba tsy hitsangana intsony;
Saingy ilay Tompon'ny ranomasina
Dia nandre ny antsoantson'ny famoizam-poko,
Nampiakatra ahy avy tao amin'ireo rano,
Ankehitriny dia voaaro aho.

¹²⁰ Ananany ny aiko aho. Ananany ny ainareo ianareo. Ananany ny ainareo ianareo, mba hanompo Azy; tsy hoe hanolotra azy, mba handeha sy handokadoka mikasika ny fiangonanareo anaram-piangonana; tsy hoe handeha ka hitsikera ny hafa; fa miezaka ny hanompo sy hamonjy ny hafa, ary mitondra azy ireo eo amin'ny fahalalana an'i Jesosy Kristy Tompo.

¹²¹ Ilay zanaka adala. Eo am-pamaranana, dia mety hilaza an'izao aho. Rehefa nandany ny fivelomany rehetra izy, ny fiveloman'ny rainy, tamin'ny fiainana tsy ara-dalàna, ka rehefa niverina tany an-trano izy. . . Nandry tao anatin'ny tranon-kisoa iray izy, ary nahatsiaro tena. Dia hoy izy hoe, "Mpanompo mikarama firy, no ananan'ny raiko, izay voakararakara tsara, nefa eto aho eo am-pahafatesana, nohon'ny tsi-fisiana." Ahoana moa raha niezaka nilaza izy hoe, "Manontany aho raha

manana vola vitsivitsy ahafahako mamerina amin'i dada (izay nolaniako tamin'ny fandosirana) an'izany?" Saingy fantany ilay natoran'ny rainy, ka hoy izy hoe, "Hitsangana aho ka handeha hankany amin'ny raiko."

¹²² Tsy nilaza mihitsy ilay ray hoe, "Andraso iray minitra, anaka! Hamerina ny volako ve ianao?" Tsia. Tsy nampandoa azy ny fahotany mihitsy izy. Faly izy fa niverina izy. Faly izy fa nahatsiaro tena izy, satria zanany izy. Zanany manokana izy. Faly izy fa teo amin'ny lalany nody izy. Ankehitriny, tsy niraharaha ny fahotany izy, fa faly izy rehefa nahatsiaro tena izy ka nanao hoe, "Efa nanota teo anatrehan'Andriamanitra, sy teo anatrehan'ny raiko aho. Hitsangana aho ka handeha hankany aminy."

¹²³ Ary rehefa nahita azy izy, avy lavitra, dia nihazakazaka izy ka nanoroka azy. Dia hoy izy hoe, "Vonoy ny zanak'omby matavy," tsy amim-bola. "Ento ny akanjo tsara indrindra," tsy amim-bola. "Ento ny peratra," tsy amim-bola, "apetraho eo amin'ny rantsan-tànanany izany. Ndao isika hihinana, hisotro, ary hifaly, satria very ity zanako ity fa hita ankehitriny. Maty izy, fa velona indray. Aoka isika ho faly mikasika an'izany."

¹²⁴ Afaka milaza an'izao aho ry sakaiza, mba hamaranana. Ny zavatra tokana izay mahafa-po, ireo tena zavatra tokana izay misy, ireo zavatra tsara tokana izay misy, dia tsy azo vidiana amin'ny vola. Fanomezan'Andriamanitra maimaim-poana izy ireo, amin'ny alàlan'i Jesosy Kristy: famonjena ny fanahy; fifaliana. Avia ka mihinàna, ary aoka ho afa-po.

Nahoana ianareo no mandany vola amin'izay tsy mofo? ary ny fisasaranareo amin'izay tsy mahafa-po? henoy tsara mihitsy aho, ka hano . . . izay tsara, dia aoka hiravoravo amin'ny matavy ny fanahinareo.

Atongilano ny sofinareo, ka mankanesa aty amiko: mihainoa, dia ho velona ny fanahinareo; ary izaho dia hanao fanekena mandrakizay aminareo, na dia ny famindrampo azo antoka an'i Davida aza.

¹²⁵ Ny zavatra rehetra izay maharitra, ny zavatra rehetra izay tsara, ny zavatra rehetra izay mahafinaritra, ny zavatra rehetra izay Mandrakizay, dia maimaim-poana, ary tsy andoavanareo na inona na inona. Any amin'ny faran'ny soratr'ity Boky ity, dia Izao no voalaza hoe, "Izay maniry, aoka izy ho avy ka hisotro avy eo amin'ny Ranon'ireo loharanon'Aina, maimaim-poana," tsy amim-bola, tsy amin-karena. Nahoana ianareo no mandany ny volanareo amin'izay tsy mahafa-po, ka mamela an'ireo tena zavatra izay mahafa-po, manafaka, ka tsy mitahiry ho an'ny tenanareo?

Ndao isika hivavaka.

¹²⁶ Raha mbola ao amin'ny fahanginana sy ao amin'ny vavaka ianareo, misy ve, ato amin'ity tranobe ity, izao maraina

izao, ireo izay tsy nisotro avy tamin'io Loharano io, ka mbola ao anatinareo foana ireo fanirian'izao tontolo izao, nefa te-hanova ny toeram-pisotroanareo ianareo, izao maraina izao, na ny zana-bolanareo? Te-hanatona ianareo ka hividy avy amin'Andriamanitra, (tsy amim-bola, tsy amin-karena), tantely sy ronono, fifalian'ny divay? Hanangana ny tãnanareo ve ianareo, hanao hoe, "Tsarovy aho, Rahalahy Branham, raha mivavaka ianao"? Andriamanitra hitahy anao, tompoko. Andriamanitra hitahy anao, tompoko. Andriamanitra hitahy anao, ranabavy. Misy hafa ve izay hilaza hoe, "Tsarovy aho, Rahalahy Branham, raha mivavaka ianao"?

¹²⁷ Ny sasany aminareo olona tanora, hia, izay nandany ny fivelomanareo. Ireo—ireo—ireo ora izay nolanian'io reny io tamin'ny vavaka ho anareo, ary dada, ny fampianarana rehetra izay nataony taminareo, kanefa nolavinareo izany, mba hihaino bitsibitsiky ny devoly. Ankehitriny dia maniry ny mozikan'izao tontolo izao ianareo, ireo zavatr'izao tontolo izao. Ary mahatsiaro tena ianareo, tahaka an'ilay zanaka adala tao amin'ny tranon-kisoa. Hanangana ny tãnanareo ve ianareo, ranabavy, rahalahy, ka hanao hoe, "Andriamanitra, tsarovy aho. Ampahatsiarovy tena aho, izao maraina izao, avelao aho ho tonga ao an-tranon'ny Ray"? Tsy misy vidiny iray ho anareo izany. Miandry anareo Izy. Tsy mampaninona izay nataonareo, "Na dia toy ny jaky aza ny fahotanareo, dia ho fotsy toy ny orampanala; mena tahaka ny sily, dia ho fotsy toy ny volon'ondry." Ireo ve no ao amin'ny Fanatrehana Masina, izay nanangana ny tãnany?

¹²⁸ Ireo izay marary sy manana ilaina, manaova hoe, "Izaho—mahatsapa ho ao anatin'ny hady iray aho. Satana no—no nanao ratsy tamiko. Nampandringa ahy izy ary nanao ahy harary, na zavatra iray. Maniry aho, izao maraina izao, ny rojon'Andriamanitra an'ny finoana mba hiditra ao am-poko, mba hisintona ahy avy ao amin'io hady io, tahaka an'ilay lehilahy teo amin'ny vavahady nantsoina hoe Itsaraendrika." Atsangano ny tãnanareo. Andriamanitra hitahy anareo, tsirairay.

¹²⁹ Tompo, mitondra eo Aminao aho, amin'ity ora ity, an'ireo izay manangana ny tãnany, ho an'ny famelàna ny fahotany. Ianao no Andriamanitra, ary Andriamanitra tokana. Eo amin'izay ipetrahan'izy ireo ankehitriny mihitsy, eo no Nitenenanao tamin'izy ireo. Eo no Nandresenaoh lahatra azy ireo fa diso izy ireo, rehefa nahita ny Toerany ny Teny, ary nanomboka niteny ny Fanahy Masina, ka nanao hoe, "Diso ianao. Mitodiha, ka manatona indray an'Andriamanitra ilay Ray." Ary nanangana ny tãnany izy ireo, mba haneho fa te-hivoaka avy ao amin'ity tranon-kisoa eto an-tany ity izy ireo, mba ho tonga ao an-tranon'ny Ray, izay misy ny fahabetsahana, izay tsy hilan'izy ireo hitondra na inona na inona. Araka ny namberan'ilay poety

tsara hoe, “Tsy mitondra na inona na inona aho eto an-tànako, eo amin’ny Hazo fijalianao fotsiny ihany aho no mamikitra.” Enga anie izy ireo ho avy, moramora, am-panetre-tena, ary ho resy lahatra, ka hanolotra ny fiainany. Ary Ianao no hitondra an’ily akanjo tsara indrindra; sy peratra iray, ary hametraka eo amin’ny rantsan-tànan’izy ireo; sy hamahana azy ireo amin’ny Manan’ily Zanak’ondry voavono. Ekeo izany, Tompo.

¹³⁰ Misy ireo izay marary sy ory. Manana ilaina izy ireo. Satana no nanipy azy ireo tao anatin’ny hady iray, tsy isalasalana, tsy fahampiam-bola ho an’ny fandidiana. Tsy isalasalana, angamba, maro amin’izy ireo no tsy afaka nodidiana. Angamba tsy afaka nanala an’ily antony ny mpitsabo, na dia nahazo vola betsaka mihitsy aza izy. Fa Ianao no Andriamanitra. Ary mivavaka aho mba amin’ity ora ity mihitsy, eo ambanin’ny hosotry ny Fanahy Masina mipetraka manatrika ankehitriny, no Hanasitrananao ny tsirairay avy amin’izy ireo. Enga anie izy ireo ho sitrana, manomboka any amin’ny lohan’izy ireo ka hatrany amin’ny tongony, ny singasingany rehetra.

¹³¹ Raha tsy manam-pifaliana izy ireo; ny famonjen’izy ireo, tsy afaka mifaly amin’izany intsony izy ireo. Araka ny nolazain’i Davida, fahiny hoe, “Avereno ny fifalian’ny famonjeko.” Enga anie izy ireo handray fifaliana sy fahasambara, nohon’ny alahelo sy fahasaran’izy ireo, fa Ianao no Vatolampy iray ao amin’ny tany mahasasatra. Ianao no fialofana amin’ny fotoan’ny tafio-drivotra. Rehefa mitoraka ny aretina rehetra sy ny balafomanga eo amin’izy ireo ny devoly, dia Ianao no fialofana amin’ny fotoan’ny tafio-drivotra. Ho tanteraka anie izany, androany, Andriamanitra, fa mangataka an’izany amin’ny Anaran’i Jesosy izahay. Amena.

Mora sy malefaka no iantsoan’i Jesosy,
Miantso anao, sy ahy;
Na dia nanota aza isika, dia manana famindram-
po sy famelàna Izy,
Famelàna ho anao sy ho ahy.

Modia . . .

¹³² Ankehitriny raha maniry ianareo, dia mankanesa eo amin’ny alitara ka mandohaleha, afaka hivavaka miaraka aminareo izahay, hanosotra anareo, ny zavatra rehetra izay azonay atao. Tongaso a ianareo.

. . . sasatra, modia;
Amin-kafanam-po, malefaka, no iantsoan’i
Jesosy,
Miantso hoe, O ry mpanota, modia!

¹³³ Tianareo ve Izy? Teddy, afaka manome anay ny feon-kira ve ianao, “Tiako Izy, tiako Izy satria nitia ahy mialoha Izy.” Afaka manome an’izany ve ianao?

¹³⁴ Ndao isika hihira an'izany ho an'ny Voninahiny, alohan'ny hanovantsika ny lamin'ny fotoana, vetivety fotsiny. Fanompoana izao. Efa nivoaka ny Hafatra. Tena faly aho fa noraisinareo Izany. Mivavaha mba hanao soa anareo Izany, satria nanao soa ahy ny niteny an'Izany. Mivavaka aho mba ilay tsindrimandry iray ihany izay nomena ahy, mba hiteny Azy aminareo, no nandraisanareo Azy tao amin'ilay tsindrimandry iray ihany izay nandefasana Azy. Enga anie ny Tompo hitahy an'Izany ao amponareo. Eny àry.

Tiako Izy,

Ankehitriny akimpio fotsiny ny masonareo, raha mihira isika. Atsangano ny tãnanareo.

Tiako Izy

Satria nitia ahy mialoha Izy

Ka nividy ny famonjeko

Teo amin'ny hazon'i Kalvary.

¹³⁵ Ankehitriny dia ndao isika hanondrika ny lohantsika, hisamonomonona an'izany. [Manomboka misamonomonona ny *Tiako Izy* Rahalahy Branham—Mpand.] Tianareo ve Izy? Tena misy ve Izy ao am-ponareo? Tsy misy zavatra mikasika Azy ve, izay tena misy mihitsy? Tiako Izy satria nitia ahy mialoha Izy, nanipy ny tadim-Piainana avy teo Kalvary, nampifikitra an'Izany tamin'ny foko.

¹³⁶ Aza adino, Rahalahy Kurmmond [Drummond] no hitory teny ho antsika rahariva, fandraisana hariva. Raha tianareo ny Tompo, dia tongava ka mandray ny fandraisana miaraka aminay. Raha sitraky ny Tompo, dia hiaraka aminareo eto aho. Izany dia ny vinantolahin-dRahalahy Tony Zabel; Rahalahy Thom avy any Afrika; ny zananilahy, zazalahy mahafinaritra; Kristiana tena tsara, matanjaka, mpitoriteny kely tsara.

Satria nitia ahy mialoha Izy

Ka nividy ny famonjeko

Teo amin'ny hazon'i Kalvary.

¹³⁷ Raha mbola manondrika ny lohantsika isika ankehitriny, raha hanohy ny piano.

¹³⁸ Tompo Jesosy, vonona ny hiditra amin'ny fotoana hafa iray izahay, Tompo. Misaotra Anaô izahay nohon'ny Fanahy Masina izay niresaka tamin'ny fonay. Ary sambatra izahay, Tompo, fa Ianao no nanao an'izany ho anay. Ary engà anie Ny Teninao tsy hiverina foana any Aminao, fa engà anie Izany hahatanteraka an'izay nasaina Nataony. Engà anie Izany hijanona ao amin'ny fonay rehetra, mba hahafantatra fa ny tena zavatra ary ireo zavatra maharitra dia avy amin'Andriamanitra, tsy amim-bola, tsy amin-karena. Nahoana àry izahay no mitolona ho an'ireo zavatra, ka manao azy ho toy ny resaka fiainana sy fahafatesana mihitsy, ho an'ireo zavatra izay ho levona? Avelao izahay hitolona betsaka, Tompo, ho an'ireo zavatra izay tsy ho levona,

izay tsy misy vidiny. Voaloa maimaim-poana ny vidiny, sy fanasana iray tongasoà hoe, “Izay maniry, aoka izy ho avy.”

¹³⁹ Tahio ny tohin’ny ampahan’ity fotoana ity. Ekeo izany, Tompo. Ary mihaonà aminay rahariva. Tahio ny fotoan’ny batisa. Enga anie hisy fandrarahana lehibe iray. Enga anie ireto olona ireto, izay hatao batisa amin’ny Anaran’Ny Zanaka malalanao, ny Tompo Jesosy, enga anie izy ireo ho feno ny Fanahy Masina. Enga anie ireto olona ireto, izay nanangana ny tàmàny, mba hibebaka, izao maraina izao, ny amin’ny fahotan’izy ireo, enga anie izy ireo ho avy, hanao an’ireo akanjo fanaovana batisa, ary hiditra ao anatin’ny dobo, ka hanaporofa amin’izao tontolo izao fa navela tamin’izy ireo ny fahotany. Ary hatao batisa izy ireo, mba hamerenana an’ilay boky amin’izy ireo. Ekeo izany, Tompo.

¹⁴⁰ Mombà an-dRahalahy Kurmmond [Drummond] rahariva raha mitondra ny hafatra ho anay izy, vaovao avy eo amin’ny Seza fiandrianana. Hosory amin’ny Fanahy Masina izy. Ary mombà anay raha mandray ny fandraisana izahay. Enga anie ny fonay hadio sy hangarangarana, enga anie tsy hisy fahalotoana ao anatinay. Enga anie ny Ràn’i Jesosy hanadio anay amin’ny fahotana rehetra. Ekeo izany, Tompo. Esory eo afovoanay ny aretina, ary omeo anay ny fifaliana sy fiadanana. Amin’ny alàlan’i Jesosy Kristy no angatahanay an’izany. Amena.

Tiako . . .

¹⁴¹ Tianareo ve Izy? Ankehitriny dia atsangano Aminy ny tàmànanareo.

Tiako Izy

Sa- . . .

Ankehitriny atsory ny tàmàna ka raiso ny tàmànan’ny olona eo akaikinareo.

. . . mialoha . . .

(Russell, tiako Izy. Raha maty aho androany, dia tiako Izy.)

Ka nividy . . .

Marina izany, atsory manodidina mihitsy ka mandraisa tàmàna.

. . . famonjeko

Teo amin’i Kalvary . . .

Eny àry, Rahalahy Neville, miaraka amin’ny teniny. Eny àry.



TSY AMIM-BOLA NA AMIN-KARENA MAG59-0802

(Without Money Or Without Price)

Ity Hafatr'i Rahalahy William Marrion Branham ity, izay notoriana tamin'ny Teny Anglisy hatrany am-piandohany ny Alahady maraina, 2 Aogositra 1959, tao amin'ny Branham Tabernacle ao Jeffersonville, Indiana, U.S.A., dia nalaina avy tamin'ny horonam-peo ary natonta manontolo amin'ny Teny Anglisy. Ity fandikana amin'ny Teny Malagasy ity dia natonta sy nozarain'ny Voice Of God Recordings.

MALAGASY

©2018 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org